

րում շինվեց գավիթը: Այս իմացանք արձանագրություններից: Սրան կաթողիկոսը աղերսագիր ուղարկեց:

Ժ. Յոթ հարյուր քսանութ (1279) թվին վանահայր եղավ Համա-գասպը:

Այս Համագասպը մեծ գործեր արեց, բազմացրեց աստվածա-յին (կրոնական) գրքերը, որոնցից շատերը կան դեռևս: Սա էր իշ-խան Քուրտի որդու օրերում և վարում էր մարմնավոր իշխանու-թյան առաջնորդությունը, իսկ ինքը Մամիկոնյան տոհմից էր, փա-ռախեղ և տեսնողներին ահագոյ մարդ էր: Այս իմացանք բազմա-թիվ գրքերի հիշատակարաններից և բազմաթիվ տեղերի արձանա-գրություններից:

ԺԱ. Յոթ հարյուր վաթսուն (1311) թվին վանահայր եղավ Վա-սիլը: Այս սովորեցինք խաչի արձանագրություններից, որի վրա գր-ված էր՝ Օհանավանքի վանահայր Վասիլը՝ Շիրակի և ամբողջ Անբերդի առաջնորդը, հիշեցեք Քրիստոսով յոթ հարյուր վաթսուն (1311) թվին:

ԺԲ. Յոթ հարյուր վաթսուներեք (1318) թվին վանահայր եղավ Ներսեսը: Սա Համագասպի ազգականն էր: Այս իմացանք գրքերի հիշատակարաններից, գրքեր, որոնք ինքը գրել տվեց, և նրա գրքե-րից շատերը մեզ մոտ կան:

ԺԳ. Ութ հարյուր մեկ (1352) թվին վանահայր եղավ հայր Աբ-րահամը: Սրա օրերում ամեն ինչ ընդհանուր էր, ոչ ոք առանձին բան չստացավ: Այս իմացանք եկեղեցու արձանագրություններից:

ԺԴ. Ութ հարյուր իննսուն (1441) թվին վանահայր եղավ Կարա-պետը: Սրա օրոք Սուրբ Էջմիածինը նորոգվեց: Կաթողիկոս դար-ձավ Կիրակոս Վիրապեցի ճգնավորը: Սրա օրերում Օհանավան-քի վանահայր Հովհաննեսը հաստատվեց Սուրբ Էջմիածնի աթո-ռակալ և ամեն ինչից տասանորդ էր հանում և տալիս Օհանավան-քին: Այս իմացանք Թովմա պատմագրից և Առաքել վարդապե-տից: Մենք նրան օգնում էինք սրբագրելիս և գրքեր կարդալիս, այդ պատճառով հարցնում էինք նրան, իսկ նա պատասխանում էր: Այս էլ իմացանք նրանից, թե տասանորդը եկել է Օհանավանք:

ԺԵ. Ութ հարյուր իննսուներկու (1443) թվին վանահայր եղան Գաբրիել Վաղարշապատեցին և Հոհան վարդապետը: Սրանք Սուրբ Էջմիածնում աթոռակալներ էին: Սրանք անմարդկայնու-

թյուն արին ուխտավորների նկատմամբ, այդ պատճառով դժգոհ մնալով դրանցից՝ մեծ բազմությամբ ժողով արին և հալածեցին սուրբ կաթողիկոս Կիրակոսին և կաթողիկոս դրին Մակվեցի Գրի-գոր եպիսկոպոսին: Այս իմացանք Թովմա պատմագրից: Այս Գաբրիելը գրչագիր էր, գրեց բազմաթիվ գրքեր՝ Հայսմավուրք, Ճաշոց, Գանձարան, Շարակնոց: Նրա գրած գրքերը ահա շատ տեղերում երևում են:

ԺԶ.Թվին (թիվը պակասում է) վանահայր եղավ Օհանա-վանքի և Բջնու Գրիգորը. սա նույն Բջնի գյուղից էր և վանահայր էր երկու վանքերի: Սա բազմաթիվ գրքեր գրել տվեց, ահա այս իմացանք գրքերից:

ԺԷ. ...Թվին (պակասում է թիվը) վանահայր եղավ հայր Խաչա-տուրը, որի մականունն էր Ալթիդուլաջ: Սա մի ջրաղաց շինեց և եր-կու ձիթհան մի տան մեջ իր Քասաղ գյուղում և հիշատակ տվեց Սուրբ Կարապետին: Այժմ ջրաղացը շեն է և կոչվում է Խրխնջան: Այս իմացանք Գայլ եպիսկոպոսից, որ նախապես գրել ենք:

ԺԸ. ...Թվին (պակասում է թիվը) վանահայր եղավ Նահապետը: Նա Նիգից էր, բայց եղավ Օհանավանքի, Սաղմոսավանքի, Ուշու վանքի վանահայր: Սա շատ գրքեր ավելացրեց Սաղմոսավան-քում: Այս իմացանք նույն Գայլից:

ԺԹ. ...Թվին (պակասում է թիվը) վանահայր եղավ Մկրտիչը. սա գտանք բանադրանքի թղթից, բայց չգիտենք որ ժամանակ:

Ի. Հազար տասնինը (1570) թվին վանահայր եղավ Գրիգոր վարդապետ Կարբեցին: Սա այն Գրիգորն էր, որին առաջինը հի-շատակեցինք: Այս իմացանք Գալուստ անունով մի բարեպաշտ քրիստոնյայից, որ հիշեցինք նախապես այս Գրիգորի համար և քննեցինք թիվը, այն էր, ինչ գրեցինք:

ԻԱ. Հազար քառասուներկու (1593) թվին վանահայր դարձավ Մատթեոսը. սա եկեղեցու զավթում մի խաչ կանգնեցրեց. խոհեմ ու երկյուղած մարդ էր: Այս իմացանք Ավետարանի հիշատակարա-նից:

ԻԲ. Հազար քառասունութ (1599) թվին Օհանավանքի, Տեղերի վանքի վանահայր եղավ Դուկասը: Սա մի ավետարան գրեց և իբրև հիշատակ դրեց Օհանավանքում, այժմ (այդ ավետարանը) Փարպի գյուղում է: Այս իմացանք նույն Ավետարանից: